



BOND VAN DIE VERMEULEN FAMILIE

Selfoon (+27) 082 880 1494

Web: www.vermeulenbond.org

Epos: vermeulenbond00@gmail.com

DIE MEULENAAR OKTOBER 2023 (Jaargang 24)

Voorwoord

Oktober is die mooiste mooiste maand het Louis Leipoldt gedig. Inderdaad sien ons oral blommeprag en groen blare. Ons vertrou al ons lede en nie-lede die skoonheid en positiwiteit wat die natuur ons bring in ons eie lewens sal ervaar.



Bond Ledetal en Nuwe Lede

Ons ledetal staan tans op 73 lede en 4 vriende. Alhoewel daar soms lede bedank is dit vir ons aangenaam om te rapporteer dat ons ledetal konstant bly. Ons bedank al ons lede wat so getrou hul jaarlikse ledegeld betaal. Ons is ook jammer om te meld dat ons vanjaar 2 lede aan die dood moes afstaan. Jacobus Daniël Vermeulen is op 17 Julie 2023 oorlede en hy was nie net ons oudste lid nie, maar ook 'n lid sedert die stigting van die Bond. Zelma Geldenhuys is oorlede op 20 Augustus 2023. Sy was 'n bestuurslid van die Bond van 2017 tot 2022. Ons innige simpatie aan haar naasbestaandes.

Facebook Blad en Webblad

Ons facebookblad se ledetal bly groei en daar is tans 759 lede. Dankie aan ons admin lede wat die administrasie van die facebookblad hanteer en diegene wat interessante feite van die Vermeulens met ons deel. Ons wil lede aanmoedig om asseblief inligting, foto's, ens. te plaas. Soos julle weet het ons 'n webblad <https://www.vermeulenbond.org> met baie nuwe artikels en interessantheide. Ons wil veral alle lede versoek om foto's en inligting oor oudhede/aandenkings van Vermeulen voorsate wat in jul besit is vir ons te stuur vir plasing op die webblad onder die opskrif *Aandenkings*.

Die gemiddelde maandelikse besoek die afgelope jaar aan ons webblad was 83 persone. Vir ons Engelssprekende Vermeulens is ons webblad in beide Afrikaans en Engels beskikbaar. Behalwe sommige van die vorige uitgawes van Die Meulenaar is alle artikels vertaal. Kliek op die tuisblad van die webblad op die Suid-Afrikaanse vlag vir die Afrikaanse weergawe en op die Britse vlag vir die Engelse weergawe. Sien illustrasie hieronder.



Die elektroniese weergawe van die 2019 opgedateerde geslagregister asook die gedenkuitgawe (gratis verskaf aan Bondlede) kan ook deur middel van ons webblad afgelaai word, indien daarvoor betaal is. Vir alle aankope, besoek asseblief ons webblad.

Geslagregister

Daar is nie meer kopieë van die geslagregister in boekvorm beskikbaar nie. Dit is onwaarskynlik dat die register weer gedruk gaan word. Indien u hierdie boek besit, bewaar dit goed, aangesien hierdie geslagregister nog 'n gesogte versamelstuk gaan word.

Die Bestuur het dit goed gedink om kortliks weer aan ons lede verslag te doen oor ons register.

Johannes Petrus (Johan) VERMEULEN begin in 1989/90 aanvanklik sy eie voorgeslag navors. Spoedig besluit hy om die totale nageslag van sy voorvader Jan Willemsz VERMEULEN na te vors. Sedert sy aftrede in 2001 was hy voltydys daarmee besig en het hy tot sy dood in 2018 inligting ingewin en die korrektheid daarvan geverifieer. Sy broer Izak Stefanus VERMEULEN het hom sedert 1996 begin help met die navorsing en was veral verantwoordelik om die inligting van Dirk Cornelisz te konsolideer en te verifieer. Izak was tot 2016 hiermee behulpsaam. Die VERMEULEN geslagregister bestaan dus uit die nageslagte van Dirk Cornelisz en Jan Willemsz.

In 2004 verskyn die eerste druk van die geslagregister en die opgedateerde tweede druk verskyn in 2011. In hierdie registers gee hul erkenning aan navorsers wat inligting aan hul verskaf het. Ander VERMEULEN stamvaders wat hul in Suid-Afrika gevestig het word ook van melding gemaak. Hulle het weinig of geen nasate gehad nie. VERMEULENS wat hul in ons buurlande gevestig het se name is ook in die geslagregister opgeneem en daarom is die naam van die geslagregister "Die geslagregister van die Vermeulen Familie in Suider-Afrika". In 2019 is 'n elektroniese opgedateerde geslagregister beskikbaar gestel wat Bondlede wat dit teen 'n nominale bedrag van R50 kan bekom. Dit is ook op CD beskikbaar.

Sedert Johan se afsterwe in 2018 het die navorsing, opdatering en insameling van inligting vir die geslagregister nie gestop nie en Hendrik Christoffel (Hennie) VERMEULEN, die broer van Johan en Izak, het voortgegaan met die taak. Sedert 2019 help Christoffel Johannes (Stoffel) Vermeulen hom hiermee.

Waar dit voorheen maklik was om inligting in te samel by staatsinstellings, veral by Suid-Afrikaanse kerke kan dit vandag nie meer gedoen word nie en word hierdie instansies verbied ingevolge Wet 4 van 2013 Wet op die Beskerming van Persoonlike Inligting (Popi Wet) om hierdie inligting te verskaf. Dit help ook nie om deesdae meer begraafplase te besoek vir inligting op grafstene nie aangesien oorledenes deesdae meesal veras word. Tans maak ons gebruik van naasbestaendes wat self hul inligting aan ons verskaf vir opdatering asook van genealogiese webblaaie wat hierdie inligting byhou en verskaf soos "Familysearch". Ons is tans besig om deur 3 500 VERMEULEN huwelike te werk om sodoende die data in ons databasis op te dateer waar nodig. Dit sal 'n geruime tyd duur. Ons databasis word bygehou deur die Legacy Familie-program.

Die inligting in ons databasis, soos julle bewus is, bestaan uit die persoon se volle name en van, sy eggenoot/eggenote se naam, geboortedatums, plek van geboorte, huweliksdatum en plek van huwelik en kinders se volle name, plek en geboorte datums. Persoonlike inligting soos adresse, selnommers en epos adresse word nie aangeteken nie. Die bron wat die inligting persoonlik verskaf en/of waar dit opgespoor is word ook aangeteken. Persoonlike notas kan ook bygevoeg word.

Dit word beklemtoon dat nie net nuwe inligting van nuwe lede nie, maar ook inligting wat tans ontbreek soos byvoorbeeld huwelike, sterftes en ander inligting van persone reeds in ons register opgeneem is, bygewerk word. In 2018 het die register van Dirk uit 18 055 name bestaan en tans is daar 18 530 name en in die geval van Jan was daar in 2018'n totaal van 5 205 en nou is daar 5 332 name.

Ek wil graag beklemtoon dat ons sekerlik een van die volledigste geslagregister het wat in Suid-Afrika beskikbaar is en ons bedank vir Johan en Izak vir wat hulle vermag het om hierdie Vermeulen erfenis daar te stel vir die nageslag. Die taak om die inligting so volledig moontlik by te hou is baie groot, wat ons tans nog met ywer verrig.

Ek wil elke Bondlid nooi om met my te skakel indien jy jou persoonlike VERMEULEN stamboom wil bekom of om inligting na te gaan of by te voeg.

Opgestel deur: Hennie Vermeulen
18 September 2023

Klub 80

Ongelukkig moes ons onlangs afskeid neem van ons oudste lid.

Huldeblyk aan Jacobus Daniël Vermeulen (Koo) D<8169> wat op 19 Desember vanjaar 89 jaar oud sou word is op 17 Julie 2023 oorlede.



19/12/1934 - 17/07/2023

Koos Vermeulen, voormalige oudste Bondlid, is in De Doorns gebore as oudste seun van Hans en Anna Vermeulen en het op die plaas Non Pareil grootgeword. Hy was hoofseun van Hoërskool De Doorns in die Hexvallei. Na skool het hy met uitvoerdruive geboer en is in 1958 met Sinie Nel getroud. Hy was `n kranige tennisspeler en het gereeld vir die eerste tennisspan gespeel. In 1964 koop hy die Hugenate plaas Les Chênes in Franschhoek en verhuis daarheen waar hy suksesvol met wingerddruive en perskes boer tot met sy aftrede toe hy na Courtrai in die Paarl verhuis. `n Seun en dogter is vir hom uit sy huwelik gebore met drie kleinseuns en drie agterkleinkinders.

Hendrik Johannes Vermeulen D<7051> Hendrik is vanjaar 83 jaar oud en hy bly in Warmbad Limpopo.

Martinus Godfried Drotskie (Tienie) Vermeulen D <11365> is vanjaar 82 jaar oud. Daar is voorheen reeds volledig oor hulle gerapporteer

Die volgende lede het vanjaar toegetree tot klub 80:

WILLEM JACOBUS PETRUS VERMEULEN D<8523> lidnr D33 het op 7 Julie vanjaar 80 geword. Willem en sy vrou Margaretha is twee bondlede woonagtig in Karasburg, Namibië.

NON PAREIL

IZAK STEFANUS VERMEULEN J<78> Lidnr. J12



Izak Stefanus Vermeulen is op 5 Desember 1943 te Hermanus gebore en hy is die tweede oudste van sewe kinders. Hy matriculeer aan die De Villiers Graaff Hoërskool in Villiersdorp. Hy trou op 29 Julie 1967 te Bellville met Patricia Beneke. Drie dogters is uit die huwelik gebore naamlik Charmain en die tweeling Tania en Michelle. Hy het ses kleinkinders waarvan 3 dogters is en 3 seuns. Sy eggenote Patricia sterf op 24 November 2002. Hy trou nie weer nie.

Na skool beklee hy verskillende werksposisies onder andere by Nasionale Pers en SentraBoer wat later Sentrasure word. Intussen het hy aan Unisa studeer waar hy die graad B.Com verwerf het, en het hy ook die versekering kwalifikasie AC11 en FC 11 verwerf. Hy werk eers in Bellville en later in die Paarl tot en met 1980 waarna hy na Randburg verhuis waar hy vandag nog woon. In 1996 tree hy af as Hoofbestuurder, Finansies en Inligtingdienste van Sentrasure na 'n dienstydperk van 25 jaar.

Na sy aftrede, hoewel onwillig aanvanklik, raak hy betrokke by die VERMEULEN navorsing op aandrang van sy broer Johan. Hy raak later feitlik voltyds besig met die Vermeulen navorsing tot 2016. Nadat hy sekere nasate inligting van Hanneltjie ontvang het, was dit Izak se taak om Dirk Cornelisz se nageslag inligting te konsolideer. Hy dien ook op die Bond se bestuur sedert stigting in die jaar 2000 tot en met 2021. Hy was ook betrokke met die samestelling en druk van die 2004 en 2011 Vermeulen geslagregisters asook die ontwerp en registrasie van ons Bondwapen. Al drie sy dogters en sy kleinseun Erich is lede van die Bond.

Izak word op 5 Desember 2023 80 jaar oud.

NON PAREIL

LEON VERMEULEN D<4460> Lidnr D52



Gebore te Postmasburg, Noordkaap, op 19 Augustus 1943 volgens my Ma, maar verkeerdelik geregistreer en uitgeskryf as 17 Augustus 1943 deur my Pa, wat die registrasie beampte was. Dus het ek nou 2 keer 80 geword.

Ek was die tweede oudste van vier kinders synde Siegfried Wilhelm, Leon, Anielle Chrisna en Daniël Cornelius Albertus.

My Pa was werksaam by die departement van Poswese en was verplaas van een dorp na die ander, soveel so dat ek in 9 skole was gedurende my skool loopbaan. Gelukkig was ek die laaste 4 jaar en 6 maande in dieselfde skool, synde die Willem Pretorius Hoërskool te Heilbron in die Vrystaat waar ek ook gematrikuleer het aan die einde van 1961.

Na matriek het ek nege maande militêre opleiding gehad en daarna voortgegaan as klerk by die Departement van Justisie, aangesien ek regte as loopbaan wou volg. Na my militêre opleiding was ek verplaas na Greytown in Natal waar ek my lewensmaat, 'n pragtige Engelse meisie, Lorna Margreet Keel, ontmoet het. Kort daarna het ek 'n pos as ingeskrewe klerk bekom by 'n prokureursfirma in Pretoria. Ek het ook ingeskryf as regsstudent by UNISA waar ek ook my regskwalifikasie bekom het.

Tydens my studie periode het ek en Lorna getrou en ons in Louis Trichardt gaan vestig vir 5 jaar. Ons seun, Pierre André is daar gebore. Daarna word ek 'n vennootskap aangebied by 'n prokureursfirma in Greytown en verhuis ons terug na Greytown waar ons gewoon het en ek het daar gepraktiseer vir 27 jaar.

Ons dogters Liezl en Rochelle word daar gebore.

Terwyl ons in Greytown gewoon het, het ek tot bekering gekom en as Christen 'n aktiewe rol gespeel in die bekering van een van my kliënte, synde Angus Buchan die Evangelis. Ons dogter Rochelle is ook later getroud met Angus Buchan se oudste seun Andrew en woon en boer hulle tans in Zambia. Ons dogter Liezl en haar Engelse man woon in Engeland en ons seun Pierre woon in Pretoria.

Ons woon die afgelopen 27 jaar in Pretoria waar ek ook gepraktiseer het as Prokureur en Insolvensie Konsultant. Ek het afgetree in 2007 en ek en Lorna woon tans in 'n pragtige aftree oord genaamd 'The Retreat' geleë in Pretoria Oos. Ons het onlangs ons 58e huweliksherenking

gevier en sien uit na nog vele jare met die genade van ons Here en Verlosser, Jesus Christus. Aan Hom al die eer en dank vir 'n vrugtevolle lewe.

Algemene Jaarvergadering (AJV)

Ons AJV is aanlyn gehou op 20 Augustus 2022. Dit was ook baie aangenaam om 'n paar nuwe gesigte vir die eerste keer op ons vergadering te sien. Ek het reeds terugvoer gegee in my jaarverslag en ook die besonderhede van die nuwe komitee aan u deurgegee asook die finansiële verslae. Die nuwe kommiteelede is:



Nicholas Francois (Nico) Vermeulen (Voorsitter)

Nico is gebore in Mafikeng en matrikuleer aldaar. Na militêre diensplig studeer op Stellenbosch en werk by Transnet tot 1993, waarna hy verskeie klein besighede besit. Getroud met Hesta en het twee kinders André en Linda. Aktief in padwedlope en onlangs rolbal.



Hendrik Christoffel (Hennie) Vermeulen

Hennie Vermeulen is afgetree en bly die afgelope jare saam met sy eggenote Christa in De Kelders naby Gansbaai. Hy hou hom nog steeds besig om die Vermeulens na te vors en om die Vermeulen geslagregister op te dateer. Hy dien sedert 2018 op die bestuur van die Bond van die Vermeulen Familie.



Christoffel Johannes (Stoffel) Vermeulen

Stoffel is gebore in Johannesburg en na sy Hoërskool opleiding sluit hy aan by SAPOS later TELKOM SA (Ltd) Hy was werksaam in Johannesburg, Vereeniging, Bloemfontein asook Klerksdorp. In 2016 treë hy af saam met sy vrou, Christel in die skilderagtige Parys (Vrystaat). Hulle het twee kinders, Wynand, Celesté en drie kleinkinders. Stoffel sluit oorspronklik aan by die Bond gedurende 2016.



Johannes Lodewicus Matthys (Johan) Vermeulen

Woon in Melkbosstrand in my beroep is in die Kernkrag Industrie (Koeberg), maar tuis is ek `n houtwerker, tuinier, nutsman in die algemeen en was lank `n soldaat. Tot op datum het ek 16 boeke en 4 digbundels geskryf. Ek het `n belangstelling in die oorlewingskuns sou ons huidige wêreld met sy sateliete, elektronika en elektrisiteit dalk nie meer daar wees nie. `n Dryfveer is om kennis agter te laat van die ou wêreld se manier van dink en doen en planne maak. Ek doen dit in geskrewe roman storienvorm, dit help dalk iemand in die toekoms.



Louise Valerie (Louise) Vermeulen

Woon in Melkbosstrand en is die skoolhoof van Seamount in Milnerton se Persoonlike Assistent en hoof van die skool se administrasie. Ek is ook `n tuinier en saam met my man onderhou ons `n groot groentetuin. Ek lees graag, brei en hekel, stap gereeld langs die strand en doen saam met my man houtwerk.

Uittreksels uit ons geslagregister

Gedurende my onlangse opdatering van ons geslagregister het ek op die volgende interessante inligting afgekom, soos aangeteken oor Vermeulen afstammeling:

Ons het alreeds in verskeie vorige artikels breedvoerig berig oor Johannes Urbanus Vermeulen <J1461> Hy het sover bekend die meeste Vermeulen kinders gehad naamlik 26 by drie vroue. Hy was nou betrokke by die dorpsstigting van Hopetown.

Portret van Johannes Urbanus



'n Merkwaardige vrou

Johannes was ook 'n ouderling in die kerk en moes ook die katkisanter onderrig. In sy klas was daar 'n blonde meisie met blou oë. Sy wens was dat een van sy seuns met haar moes trou. Skynbaar het hul nie Johannes se belangstelling gedeel nie, want op 18 April 1860 trou Johannes te Colesberg met die katkisant - Clasina Fredrica Grabe <J1473> gebore 12 Desember 1842. Sy was 17 en Johannes 44. Die ouderdomsverskil was skynbaar nie relevant nie - die egpaar het 17 kinders gehad. Die jongste kind is op 4 Augustus 1883 gebore toe Johannes reeds 67 jaar oud was. Johannes is 4 maande later oorlede op 21 Desember 1883.

Clasina trou weer op 9 Januarie 1885 met die wewenaar, Johannes Petrus (Jan) DU TOIT.

Ten opsigte van Jan DU TOIT en Clasina die volgende inligting, soos wat dit aan ons verstrekk deur Bennie en Stienie PIETERS. "'n Konsep van die laaste paar bladsye van die DU TOIT-hoofstuk van die beplande familiealbum van my en my vrou Stienie.

Jan DU TOIT was goed bevriend met die VERMEULENS van Elandsdraai. Hy het op die aangrensende plaas Doornbult gewoon. Jan was twee keer van tevore getroud en met sy huwelik met Clasina het hy nog tien kinders in die huis gehad en Clasina nog dertien kinders. Met 23 kinders in die huis, is daar volgens oorlewering elke dag 'n skaap geslag en moes daar elke dag 'n aantal brode gebak word. Die kinders het op bulsakke (sagte verematrasse) op elke oop plek in die huis geslaap.

Op Oranjerivierstasie, op Doornbult was 'n Anglo-boereoorlog konsentrasiekamp. Per pad was die konsentrasiekamp sewe kilometer vanaf die Du Toits se woning, kortpad deur die veld slegs twee kilometer.

'n Goeie vriendin met haar kinders was in die konsentrasiekamp. Clasina het haar gereeld besoek en het haar en die kinders van melk, sop, gaar kos en ook klere, komberse, seep en medisyne voorsien. Sy het ook gereeld van die kinders gestuur om, kortpad deur die veld vir die vriendin en die kinders kos, vrugte, groente en soms ook blomme te gaan gee.

In die Volksblad het 'n aantal jare gelede 'n foto verskyn met die opskrif; "WIE KEN DIE MENSE".

Die berig is geplaas deur 'n Mnr. van den Berg en lees soos volg:

"Mnr. JG van den Berg, Schoongesig, Bloemfontein, het in sy besit hierdie portret wat tydens die Boere-oorlog deur 'n Britse soldaat uit 'n huis aan Modderivier geneem is. Die soldaat het Mnr. van den Berg gevra om die portret terug te gee aan die eienaar. Vir informasie kan aan mnr. Van Berg geskryf word"

Die portret is die van Clasina en haar tweede man Jan DU TOIT, waarvan ons 'n afdruk het.

Die oorspronklike is vermoedelik gesteel uit die woning van Clasina se vriendin voordat hul woning deur die Britse soldate afgebrand is.

Clasina was ook bekend vir haar medisynetrommeltjie. Op Hopetown en Doornbult het sy met haar medisyne, boererate en kennis van siektes en kwale baie mense gehelp. Verallyn die tyd toe

daar nie 'n geneesheer op Hopetown was nie. Selfs in Dr. O'Reilly se tyd het sy baie vrouens gehelp wat te skaam was om die dokter te besoek.

Gedurende haar laaste jare woon sy by haar jongste DU TOIT dogter Jacoba Helena (Kotie) getroud met Hubert MONTGOMERY in Queenstraat, Hopetown.

Die grafskrif toon haar besonderhede as: Clasina Fredrika Du Toit, Geb. Grabe.1843 – 1929.”

Portret van Jan en Clasina



Britstown se Vermeulen kosters

Christoffel Johannes Vermeulen <D1546> was algemeen as Oom Tollie bekend. Hy was 'n bekende vervoerkontrakteur van Britstown en het alle goedere vanaf die stasie en terug vervoer. Christoffel was vanaf 1944 tot met sy dood koster van die NG Kerk, Britstown. Voor hom was daar drie ander VERMEULEN kosters, (PH VERMEULEN, 1884 - 1885, PA VERMEULEN, 1893 - 1901 en Wynand VERMEULEN, 1906 - 1926). Tydens die begrafnisdienst vir Christoffel het een van die sprekers opgemerk dat: " As die hokkie, met die tou waarmee die klok gelui is 'n sagte vloer gehad het, sou hierdie VERMEULEN kosters se knieë, in gebed voor elke gelui, diep merke gelaat het ".

Finansies

Die Bond se finansies is kern gesond en het ons op 28 Februarie 2023 die bedrag van R41 123 in ons spaarrekening en bank gehad. Ons wil dankie sê aan Nico Vermeulen wat as tesourier die afgelope jaar die Bond se finansiële hanteer het.

Vermeulen-Dag Viering

Ons het vanjaar weer op 9 Augustus VERMEULEN-DAG gevier en heelwat Vermeulens het positief reageer op ons facebook blad. Baie dankie aan almal se positiewe bydrae. Al die Vermeulen afstammeling word aangemoedig om mee te doen.

VERMEULEN TROTS (1)

Go Vermeulens Go!

Twee Vermeulens was betrokke by die rugby toets tussen die Springbokke en die Wallabies op 8 **Julie** 2023 by Loftus in Pretoria, naamlik kaptein Duane Vermeulen en kaptein Henco Vermeulen. Duane se name is Daniël Johannes Vermeulen en hy is op 03 **Julie** 1986 in Nelspruit gebore. Sy naam verskyn onder verw. RIN nr. D <12736 in die Bond register. Henco Leopold RIN nr. J<3111>. j1 is op 20 **Julie** 1973 in Pretoria gebore.

Beide se lewens-passie het op 8 **Julie** 'n hoogtepunt bereik. Duane Vermeulen was die Springbokke se eerste kaptein vir 2023 en het Suid Afrika se nasionale span tot 'n oorwinning oor Australië op Loftus Versfeld gelei. Die gewese Stomers en Bulle se No 8 is die derde oudste springbok kaptein (37 jaar) wat, naas Victor Matfield en Schalk Brits (beide 38 jaar oud), 'n Springbokspan aangevoer het.



Kaptein Henco Vermeulen was lid van die vlugbemanning van een van die twee FlySafair 737-800 Boeing vliegtuie wat verbyvlugte oor Loftus Versfeld voor die wedstryd gedoen het. FlySafair het op dié dag 'n dubbel verblyvlug oor Loftus onderneem ter ondersteuning van die Springbokke voor die afskop van hulle deelname aan die Rugby Kampioenskap toernooi vir 2023.

Soortgelyke verbyvlugte is in 2017 en 2022 met 'n enkel FlySafair 737 Boeing vliegtuig uitgevoer. Met die 2017 vlug het Safair sy verbintenis met die Springbokke bekend gestel en bevestig dat die lugredery 'n borg van die Springbokke is. FlySafair se verbyvlug op 22 Augustus 2022 was gerig op die bevestiging van die slagspreuk "GO BOKKE" by die Springbok ondersteuners asook om nasionale trots en vertroue in lugvaart te versterk.

Die twee FlySafair 737-800 Boeing vliegtuie wat verbyvlugte oor Loftus Versfeld voor die wedstryd op 8 Julie 2023 gedoen het, is deur ses van Safair se straler loodse beman. Die bemanning in elke vliegtuig het bestaan uit twee vlieëniers en een veiligheidsvlieënier. Al ses die bemanning was straler kapteins en instruktors met dekades se vliegervaring. Die goedkeuring vir en die beplanning en inoefening van die verbyvlug het meer as twee maande se intensiewe voorbereiding geverg. Deeglike vlugbeplanning en inoefening in 'n vliegsimulator was hoë prioriteit ten einde 'n aanskoulike en veilige verbyvlug met twee B737 stralervliegtuie in 'n 'neus tot stert' formasie te verseker.



Kaptein Steve van der Merwe, B737 Vloot Kaptein by FlySafair, was die veiligheidsvlieënier op ZS-ZWO en Kaptein Henco Vermeulen, B737 Toets (Check) Kaptein by FlySafair, was die veiligheidsvlieënier op ZS-FGZ. Henco staan links in die foto van die vlieg-span van ZS-FGZ. Sy groot glimlag onderskryf sy tevredenheid met die veilige, doeltreffende en aanskoulike verbyvlug van die twee Boeingstralers.



Henco Vermeulen is sedert 2015 kaptein in beide die Boeing 737-400 en die 737-800 vloot van Safair en is oorwegend betrokke by die vervoer van passasiers, nasionaal en internasionaal op verskeie roetes van FlySafair. In 2021 het hy Safair en Burgerlugvaart se uitkomsgebaseerde kursus in die Evaluasie, Kontrole en Inspeksie van vlieëniers se vliegvaardigheid gedoen en suksesvol voltooi. Sedert 2022 is hy 'n Lyn Toets Kaptein Vlak 1 asook lid van FlySafair se elite groep van vlieëniers wat meer as 820 uur in 2022 gevlieg het. Deesdae spandeer hy baie van sy vliegtyd aan die taksering en evaluasie van FlySafair se B737 vlieëniers.

Sy posisie as Senior Lyn Toets Kaptein verg dat Henco, bykomend tot sy normale vliegprogram, betrokke is by die assessering van vlieëniers se vliegbevoegdheid, hulle vliegveiligheidsoptrede en vliegvaardighede. Hy takseer onder andere die mate waarin die B737 vloot se vlieëniers voldoen aan die nege (9) bevoegdheidsstandaarde van FlySafair en hy gee terugvoer hieroor aan die Vliegopleidingsafdeling asook die Vloot kaptein. Die taksering en terugvoer geskied tydens die proses van vlieëniersopleiding asook wanneer hy vlugbemanning moet evalueer tydens operasionele lynvlieg-aktiwiteite.

Op 8 Julie 2023 het Duane Vermeulen en Henco Vermeulen die Bond van die Vermeulen Familie se leuse Non Pareil (Niks beter nie) vergestalt en gestand gedoen.

Met waardering ontvang van Bond lid Leopold Petrus (Leo) Vermeulen, woonagtig in Australië

VERMEULEN TROTS (2)

Die Vermeulens van Stanford stam af van Johannes Petrus Hendricus (Jan) Vermeulen <35>, 'n afstammeling van die stamvader Jan Willemz Vermeulen. Jan verhuis in ongeveer 1858 vanaf die Napier/Bredasdorp distrik na die plaas Hartebeeskloof in die Stanford omgewing. Van sy afstammeling is in Stanford woonagtig vir die volgende vier generasies, 'n tydperk van meer as 150 jaar. Van die die laaste geslag Vermeulens wat op Stanford grootgeword en skoolgegaan het, stam af van Jan se kleinseun, Hendrik Johannes Hermanus (Hendrik) Vermeulen <58>, gebore op Stanford in 1888. Hendrik, soos sy pa, vestig homself as bouer, en baie van Stanford se geskiedkundige huise is deur hom gebou. Sy woonhuis in Queen Victoria straat huisves in die sestigerjare die munisipale kantore, en word vandag as poskantoor en biblioteek gebruik. Hendrik was getroud met Elizabeth (Bet) Gertruida Carse, dogter van George Fairbairn Carse en Susanna Margaretha Magdalena de Villiers. Bet was die agterkleindogter van George Fairbairn Carse, van skotse afkoms, wat deur Robert Stanford as tuigmaker na die plaas De Kleine Riviers gebring is. Die dorp Stanford is op die plaas gevestig en na Robert Stanford vernoem.



Oupa Hendrik (Geb 1888)

Pa Johnie (Geb 1929)

Hendrik en Bet het ses kinders gehad, wat almal op Stanford grootgeword en skoolgegaan het. Van die kinders is dit egter net die tweede oudste seun, Johannes Petrus (Johnie) Vermeulen <2766> wat hom op Stanford vestig. Johnie se afstammeling word so waarskynlik van [Grab your reader's attention with a great quote from the document or use this space to emphasize a key point. To place this text box anywhere on the page, just drag it.]

die laaste Vermeulens wat op Stanford grootword en skoolgaan. Hierdie is 'n kort oorsig oor hierdie gesin se geskiedenis en waar hulle hulself in die latere lewe bevind.

Johnie, of Johnie the Gong soos hy homself graag voorgestel het, was bekend as 'n joviale karakter en storieverteller in die Strandveld. Hy begin sy loopbaan as 'n berede polisieman op Heidelberg in die Wes-Kaap, en werk later as klerk vir die departement van bosbou op Riversdal. Hy verhuis rondom 1960 na Stanford waar hy onder andere betrokke is met die bou van die eerste teerpad tussen Hermanus en Gansbaai, en later as eindomsagent werk. Hy werk ook saam met sy ouer broer, George Fairbairn Carse Vermeulen <2765>, in die bamboesbedryf. Johnie was getroud met Anna Susanna (Annetjie) Fourie, oorspronklik van die Overbergse plaas Houtbaai naby Van Brakel se stoor. Annetjie was aan moederskant verwant aan die De Villiers familie van die Overberg en Stanford. Vier kinders word uit die huwelik gebore, naamlik Hendrik Johannes

(Johan) <2776>, Wessel Johannes (Wessel) <2777>, Petrus Johannes (Piet) <2778> en Sophia Margaretha (Marieta) <2779>. Almal gaan skool by middelbare skool Okkie Smuts op Stanford, voordat hulle matriek voltooi by Hoërskool Overberg op Caledon. Al drie seuns voltooi hulle nasionale diensplig in die lugmag.



Op die foto van links na regs:
Prof Johan, Wessel, Marieta, Ma
Annatjie, Piet en Pa Johnie

Na diensplig studeer Johan elektriese ingenieurswese by die Stellenbosch Universiteit. Hy sluit hom na drie jaar by Eskom by Stellenbosch Universiteit aan as lektor in elektriese en elektroniese Ingenieurswese, waar hy verder studeer en M.Ing en Ph.D grade in elektriese ingenieurswese verwerf. Een van Johan se stokperdjies is musiek, en hy raak so betrokke by die Departement van Musiek waar hy vir 'n aantal jare ook voorgraadse en nagraadse klasse in musiektegnologie aanbied, en later 'n M.Phil graad in musiektegnologie verwerf. Johan tree in 2022 as medeprofessor in ingenieurswese op Stellenbosch af. Benewens sy voorgesette betrokkenheid by nagraadse studente in ingenieurswese, hou hy hom besig met musiektegnologie in sy tuisateljee, asook radio amateur aktiwiteite.

Johan is getroud met Georgine Blignault, afkomstig vanaf Plettenbergbaai. Hulle het twee dogters, Vicki-Mari en Liezl Mari. Vicki volg in haar pa se voetspore en verwerf B.Ing en M.Ing grade in elektriese ingenieurswese aan Stellenbosch Universiteit. Liezl kies 'n loopbaan in geo-informatika, en verwerf B.Sc, B.Sc Hons en M.Sc grade in die vakrigting by Stellenbosch Universiteit. Sy is tans 'n doktorsale student in geo-informatika en klimaatverandering aan die Leuven Universiteit in België.

Wessel kies 'n loopbaan in natuurwetenskappe en verwerf 'n B.Sc graad in boskunde-natuurweskunde aan die Universiteit van Stellenbosch. Hy trou met 'n medestudent, Cobri Bosman. Na hulle voorgraadse studies, gaan werk hulle onderskeidelik vir die Department van Bosbou en die navorsingsinstituut van plantkunde in Pretoria. Wessel studeer verder en verwerf B.Sc Hons en M.Sc grade in plantekologie by Pretoria Universiteit. In 1989 verhuis hulle na Knysna, en raak gemoeid met beplanning- en navorsingswerk in die inheemse woude in die Suid-Kaap en Tsitsikamma. Wessel sluit in 2005 by Suid-Afrikaanse Nasionale Parke (SANParke) aan as navorser, en verwerf in 2009 'n Ph.D in bewaringsekologie by Stellenbosch Universiteit. Hy tree in 2019 op Knysna af. Wessel se belangstellings fokus op die natuur en reis, en hy reis wyd in Suider Afrika, insluitende Malawi, Mosambiek, Botswana, Angola, Zambië en Namibië. Sy werk as navorser in inheemse woude neem hom ook na lande soos Kameroen en die Sentraal-Afrikaanse Republiek. Wessel en Cobri het geen kinders nie, maar is nou betrokke by dierewelsyn op Knysna, waar Cobri tans die voorsitter is van die Knysna Dierewelsyn Vereniging en Wessel hom bekwaam het as dieregedragspesialis.

Na voltooiing van diensplig, verwerf Piet 'n Nasionale Diploma in opmeting. Hy werk vir etlike jare vir die landmeter generaal in Bloemfontein en Kaapstad, die privaatsektor op Hermanus, en is

tans werksaam by Kaapstad metropolitaanse munisipaliteit. Piet is getroud met Marietjie Truter, oorspronklik van Koringberg, en die egpaar het twee seuns, Divan en Jacques. Beide Divan en Jacques kies loopbane in geo-informatika. Divan verwerf B.Sc en M.Sc grade in geo-informatika by Stellenbosch Universiteit, terwyl Jacques 'n Nasionale Diploma in kartografie verwerf.

Na matriek gaan werk Marieta as administratiewe beampte by Goodwood munisipaliteit. Sy trou met Steven Terhoven, en die egpaar het twee seuns, Theo en Emil. Theo volg aanvanklik 'n loopbaan in spyseniering en bekwaam himself as sjef. Emil verwerf 'n B.Com graad in bemarking deur Unisa en is vandag werksaam as musiekinstrukteur in kitaar en perkussie. Marieta deel Wessel se liefde vir reis en die natuur en sluit gereeld by hom aan op sy reise in Suider Afrika.

Met dank ontvang van Prof HJ (Johan) Vermeulen PhD(Eng), MEng, MPhil, BEng | CMVP CEM

Ander inligting

Vermeulen Familie Saamtrek wat jaarliks vir 49 jaar reeds plaasvind.

Hierdie artikel is ook onlangs op ons webblad verskyn. Diegene wat dit gemis het, kan dit gerus gaan lees onder die opskrif "Erfenis ... Unieke Saamtrek" op ons webblad.

Die volledige artikels wat bogenoemde verbintenis volledig uitbeeld word aangetref op ons webblad en in die Gedenkuitgawe.

Ter afsluiting

'n Pragtige kort storie en gedig van komiteelid, Johan Vermeulen:

`n Spookstorie

Hulle sê: "Skryf 'n storie" Ek vra: "Oor wat?" Hulle sê: "'n Spookstorie maar net een bladsy" Ek dag net een blad! Daai wil gedoen wees. 'n Spookstorie het mos 'n laaaaanng aanloop en net 'n klein stukkie spook. Dit is eintlik 'n poefstorie wat jy rêrig moet laat klink maar om 'n spook te hê en iemand om vir die spook te skrik moet jy mos 'n tipe skeiding hê. Die spook aan daaikant en jy aan diekant of is dit dalk andersom. Jy aan daaikant en die spook aan diekant. Wag nou, wag nou, stadig eers. Watter kant is nou eintlik jou kant en watter die spook se kant of is daar ooit 'n kant? Jy sien, spookstorievertellers se bekke kan baie glad wees. Hulle verduidelik nie, vertel net. Die krake en holtes moet jy maar self invul so tussen die miskien moontlike en miskien onmoontlike deur en gou sit jy met 'n gedrog van 'n spookstorie wat jy eintlik self geskep het. Gee die spook ook 'n kans. Die spook het mos ook 'n sê.

Die spook het ook 'n sê.

*Die oggend toe ek dood wakkerskrik
En verskrik die laken oopruk
Maar die laken bly lê
Jy is dood ek sê*

*Watse dood, ek is dan hier
Net in gees is jy hier
Daar lê jou vlees
Uitgestrek en ongenees*

*Jou tyd is verby
Maar nog `n rukkjie kan jy bly
Kyk maar rond
Behalwe jy is almal gesond*

Die Spook



Vermeulen-heildronk

Glasië word borshoogte gehou en almal teenwoordig sê saam:

Op hulle wat was

Op ons wat is

Op hulle wat kom

(Glasië word bokant kop gelig)

(Uitroep) Non Pareil!!

Glasië-inhoud word gesluk (Erkenning aan Johan (JLM) Vermeulen)

NON PAREIL